

Fundacion Herencia Historico di Aruba:

Charla di dr. Wever : 'Descendencia di nos poblacion' den e Bario di Brazil



“Ta posibel pa - segun mi bay ta creciendo - mi DNA por cambia pa medio di mutacion?” tabata e pregunta di un hoben di 12 aña di edad. Max Ng ta yiu homber di un tata Asiatico y un mama Arubiano. Atentamente y cu blocnote den man e hoben a sinta scucha e charla di dr. Wever te na final, pa despues haci su preguntanan hopi al caso.

E mainta di charla na San Nicolas tabata dedica na un di e diez hende muhenan cu ta simbolisa e resultado di e investigacion di dr. Oswald Wever. Y esey ta: “Nos mama, su mama y nan welanan ta determina nos descendencia pa generacionnan cu ta bin”. A duna homenahe na Sra. Juanita Quant-Tobel (q.e.p.d) y su Famia como un ehempel bibo di e convivencia estrecho asina tradicional cerca e poblacion Arubiano. “Henter e ‘tribu’ ta biba riba e mesun pida tera na Weg Sero

Blanco den cercania di otro, cuidando otro”. Un característica cu ta duna indicacion fuerte di e determinacion ta foi unda nos descendencia geografico ta bin.

Historia ta señala e influencia Caucasio/Europeo di e colonisado y esun Africano durante e epoca di Slavitud den e poblacion Arubiano. No obstante ciencia genetico ta comproba cu a pesar di e efecto di ‘migracion’ den cualkier continente na unda ya caba ta biba un poblacion indigena, e genetico di e indigena lo sigui ta dominante. Di e forma aki den e tres origen nan di e poblacion Arubiano (Amerindio/Indjan, Africano, Caucasio/Europeo) e aspecto Amerindio/Indjan lo continua pa generacionnan cu ta bin, cerca mucho mas cu solamente un Indjan.

Ciencia biologico a comproba cu pa medio di naturalesa na momento di procreacion entre un pareha, caracteristicanan ta wordo traspasa tanto

pa medio di e homber como pa medio di e hende muhe pa e siguiente generacion. E mesun biologia ta determina cu e hende homber pa medio di su Y- cromosoom (sperma) ta traspasa su caracteristicanan pa solamente e yiu homber. En cambio e hende muhe pa medio di su ovario ta traspasa su gen nan tanto pa e yiu muhe como pa e yiu homber. Consecuentemente mester conclui cu ta e hende muhe ta determina e descendencia etnico geografico di cualkier poblacion.

Ciencia genetico ta ocupa su mes especificamente cu identificacion di e gen nan cu pa medio di testnan den laboratorio por wordo alcansa. E asina yama DNA y mas

preciso ainda mitocondriaDNA. E balor indiscutibel di un investigacion mitocondriaDNA ta: pa reconoce y comproba e predisposicion pa cierto enfermedadnan den un poblacion. Esaki lo yuda ciencia medico pa actua preventivo. Pero tambe lo aporta na salvaguardia tradicion y cultura di un poblacion pa e por traha riba su destino.

Nacion, nacionalidad y paspoort ta un asunto di ciencia huridico-politico. Un hende por carga dos paspoort pareu, e hende por hasi cambio di nacionalidad, pero e mesun hende aki ta forma parti di un solo descendencia etnico. Esaki nunca por cambia! Bo ta un Amerindio/Indjan, un Caucasio-Europeo of un

Africano.

Diadomingo 18 di October proximo, Fundacion Herencia Historico di Aruba cu sosten di UNOCA ta presenta un bialha mas e charla informativo/educativo di Dr. Oswald Wever. Esaki ta tuma luga den Bario Brazil na Centro di Bario Brazil. E mainta ta cuminsa for di 10:15 di mainta pa 12:00’or di merdia. Henter pueblo di Aruba, pero particularmente e pueblo di Brazil y vecindario ta keda cordialmente invita. Un boca bisa otro. Un y tur ta bonbini. Entrada ta gratis. Lo tin algun boca dushi y bebida crioyo pa refresca e mainta.

No kere loke e spiel ta musttra bo. Si bo no busca bo raiz, nunca lo bo sa bo destino. □